

CONVENIO DE COLABORACIÓN ENTRE O INSTITUTO DE ESTUDOS DO TERRITORIO, AUGAS DE GALICIA E A ASOCIACIÓN PARA A DEFENSA ECOLÓXICA DE GALICIA (ADEGA) PARA O DESENVOLVEMENTO DUN PROGRAMA DE EDUCACIÓN PARA A SUSTENTABILIDADE DOS RÍOS (PROXECTO RÍOS)

Dunha parte, Ángeles Vázquez Mejuto, conselleira de Medio Ambiente, Territorio e Vivenda, nomeada polo Decreto 60/2022, do 15 de maio, en nome e representación do Instituto de Estudos do Territorio (IET) e no exercicio das facultades conferidas polos artigos 12 e 13.1 do Decreto 244/2011, do 29 de decembro, polo que se aproban os estatutos do organismo autónomo Instituto de Estudos do Territorio.

Doutra parte, Ethel María Vázquez Mourelle, conselleira de Infraestruturas e Mobilidade, nomeada polo Decreto 60/2022, do 15 de maio, en nome e representación da entidade pública empresarial Augas de Galicia, no exercicio das funcións atribuídas polos artigos 13 da Lei 9/2010 e 6 do Estatuto da entidade pública empresarial Augas de Galicia, aprobado polo Decreto 32/2012, do 12 de xaneiro.

E doutra, Roi Cuba Dorado, presidente da Asociación para a Defensa Ecolóxica de Galicia (ADEGA), en nome e representación da entidade conforme ás facultades que lle outorgan os seus Estatutos.

As partes recoñécense mutuamente a capacidade legal suficiente na que interveñen para o outorgamento do presente convenio de colaboración e a tal efecto

EXPOÑEN

PRIMEIRO. Augas de Galicia, entidade creada pola Lei 9/2010, de 4 de novembro, de augas de Galicia e regulada polo Decreto 32/2012, de 12 de xaneiro, polo que se aproba o seu estatuto é unha entidade pública empresarial do sector público autonómico de Galicia,



adscrita á Consellería de Infraestruturas e Mobilidade con personalidade xurídica propia e plena capacidade de obrar para o cumprimento dos seus fins, que ten por finalidade, entre outras, a preservación e mellora do medio ambiente e, en particular, dos ecosistemas acuáticos.

Entre as competencias que se atribúen a esta entidade figuran, en materia de desenvolvemento sostible, a realización de programas, proxectos e accións de cooperación para a implementación da Axenda 2030 e para a consecución dos obxectivos de desenvolvemento sostible en materia de augas.

SEGUNDO. O Instituto de Estudos do Territorio, creado pola Lei 6/2007, do 11 de maio, de medidas urxentes en materia de ordenación do territorio e do litoral de Galicia, lei derogadas pola vixente Lei 1/2021, do 8 de xaneiro, de ordenación do territorio de Galicia, e regulado polos seus estatutos, aprobados polo Decreto 244/2011, do 29 de decembro, é un organismo autónomo do sector público autonómico de Galicia, adscrito á Consellería de Medio Ambiente, Territorio e Vivenda, con personalidade xurídica propia e plena capacidade de obrar para o cumprimento dos seus fins que ten atribuídas as competencias en materia de promoción do desenvolvemento sostible da sociedade galega, o establecemento de medidas necesarias para a efectiva implantación do desenvolvemento sostible e o fomento da participación cidadá, así como o desenvolvemento de programas, accións e actividades formativas de concienciación para a sostibilidade dirixidas ao conxunto da sociedade, que serán executadas tanto a través dos seus propios recursos e programas como en colaboración con outras entidades.

TERCEIRO. Augas de Galicia e o Instituto de Estudos do Territorio consideran a educación e sensibilización sociais como unha das ferramentas máis importantes na consecución dos obxectivos da Directiva 2000/60/CE, do Parlamento Europeo e do Consello, de 23 de outubro de 2000, pola que se establece un marco comunitario de actuación no eido da política de augas, coñecida como Directiva Marco de Auga. Obxectivos que estes organismos asumen como propios e entre os que cabe destacar, no ámbito de aplicación deste convenio, a



protección das augas superficiais continentais, e mais especificamente dos ecosistemas fluviais.

Este obxectivo fundamenta a necesidade de dar a coñecer o papel fundamental dos ríos e as problemáticas ambientais ligadas a estes, así como achegar prácticas e comportamentos que permitan aos cidadáns o mantemento e mellora dos cursos fluviais mediante a práctica de dinámicas que fomenten a participación cidadá.

CUARTO. A Asociación para a defensa ecolóxica de Galicia (en adiante ADEGA), tal e como se recolle nos seus estatutos fundacionais, é unha asociación sen ánimo de lucro que ten por obxectivo a defensa do medio ambiente galego a través de liñas de traballo encamiñadas á posta en marcha dun modelo de desenvolvemento ecoloxicamente sostible e socialmente xusto.

QUINTO. ADEGA ven desenvolvendo dende hai anos accións concretas no fomento e mantemento da sostibilidade dos ríos. Neste sentido, dispón da infraestrutura e dos medios técnicos axeitados, así como da experiencia necesaria en coordinación de voluntarios. Ademais nestes anos consolidou unha ampla rede de voluntariado que garante unha capacidade de difusión e repercusión das actividades únicas en Galicia.

SEXTO. As partes asinantes deste convenio comparten en común a defensa e promoción da sostibilidade dos ecosistemas fluviais de Galicia e consideran de gran importancia levar a cabo conxuntamente o desenvolvemento de diversas actuacións de colaboración e cooperación no ámbito do desenvolvemento sostible da educación para a sostibilidade.

SÉTIMO. Considerando que todas as partes comparten un interese común e coincidente, ADEGA, en calidade de entidade promotora non pretende con esta actuación acadar un beneficio económico, motivo polo cal Augas de Galicia só financiará á asociación en concepto de compensación dos gastos nos que aquela incorra para a realización das actividades conveniadas.



OITAVO. De acordo co artigo 20.2.c da citada Lei de augas en relación co artigo 2.2 do seu Estatuto, Augas de Galicia poderá celebrar convenios con outras administracións públicas e empresas e institucións públicas e privadas.

NOVENO. *O Proxecto Ríos* é unha iniciativa de referencia na promoción e divulgación do desenvolvemento sostible dos ríos, tanto en Galicia como no resto do Estado, e non existen iniciativas ou experiencias semellantes tanto cualitativa como cuantitativamente.

En consecuencia as partes acordan a subscrición do presente convenio de colaboración, con suxeición ás seguintes:

CLÁUSULAS

PRIMEIRA. OBXECTO DO CONVENIO

O obxecto deste convenio de colaboración é establecer as condicións que rexerán a participación e colaboración entre Augas de Galicia, o Instituto de Estudos do Territorio e ADEGA para desenvolvemento das actividades e actuacións planificadas para o ano 2022 no marco do "PROXECTO RÍOS".

O "PROXECTO RÍOS" é un programa de voluntariado e educación para a sostibilidade que pretende dar resposta a unha problemática de ámbito galego (e tamén global) como é a contaminación e o deterioro dos ecosistemas fluviais.

Este programa contribúe á busca de solucións ligadas aos ríos a través da participación cidadá. A proposta de traballo do Proxecto Ríos baséase na inspección das condicións ecolóxicas dos ríos, realizada por voluntarios locais responsables da vixilancia e protección do treito de río que seleccionan, mediante unha metodoloxía de observación sinxela e estandarizada de doada aplicación e desenvolvemento.



As finalidades principais do Proxecto Ríos son dar a coñecer o papel fundamental dos ríos e as problemáticas ambientais a eles asociadas, e aportar prácticas e comportamentos que permitan aos cidadáns o mantemento, e se cadra, a mellora dos cursos fluviais mediante dinámicas que fomenten a súa participación.

Un obxectivo fundamental é a divulgación da "custodia fluvial" (vertente da custodia do territorio), ferramenta de conservación centrada no concreto ámbito dos ríos, das ribeiras e do patrimonio etnográfico e cultural vinculados a eles. Dedicarase especial atención á divulgación de esta ferramenta de conservación, de tal xeito que, se realizarán as actividades do anexo I, tendo como nexa de unión a custodia fluvial.

Os obxectivos xerais inspíranse nos emanados da Conferencia Intergubernamental de Tbilisi (1977), así como nas recomendacións emanadas da Estratexia Galega de Educación Ambiental.

Ademais, como obxectivos específicos se asumen os seguintes:

- Contribuír ao coñecemento dos principais problemas ambientais locais e globais, particularmente aqueles relacionados coa dispoñibilidade de auga doce, e poder participar na súa resolución.
- Mostrar aos participantes as súas responsabilidades ambientais, especialmente na contaminación das augas e a súa conservación.
- Promover o coñecemento da fauna e flora dos ecosistemas de ribeira.
- Interpretar o ciclo da auga a escala global e local, dilucidando o papel do cidadán nese ciclo.
- Facilitar as visitas e as vivencias con material específico e persoal especializado.
- Espertar a curiosidade sobre a interrelación de aspectos naturais, culturais, históricos, sociais, económicos, etc., e promover unha visión integral da cidade ou vila e o seu contorno fluvial.
- Dispor dunha sede física e virtual onde centralizar as actividades do Proxecto Ríos e os recursos de educación ambiental sostible, facilitando o acceso aos usuarios.
- Fomentar o desenvolvemento da educación ambiental sostible a nivel local municipal, ofertando programas de actividades para diferentes grupos sociais.



SEGUNDA. CONTIDO DA COLABORACIÓN

Para o cumprimento do obxecto deste proxecto, ADEGA comprométese a:

1. Realizar as actividades indicadas no Anexo I deste convenio, achegando os medios para a realización destas actividades.
2. Informar regularmente e especialmente, cando sexa requirido e na forma que o requira o ente público Augas de Galicia e o Instituto de Estudos do Territorio, sobre calquera aspecto relacionado co obxecto do convenio.
3. Compartir con Augas de Galicia os datos xeorreferenciados das actuacións realizadas e todos os datos de calidade das augas obtidos. Para isto, o Instituto de Estudos do Territorio, deseñará e desenvolverá o xeoportal de participación cidadá para a información hidrográfica de Galicia, de modo que as persoas que desenvolvan os traballos de campo dispoñan neste portal web dos privilexios de usuario necesarios para a introdución da información nel.
4. Confeccionar un informe detallado, en formato papel e electrónico, de tódalas actuacións realizadas, con indicadores cuantitativos e cualitativos dos resultados acadados.
5. Crear un documento divulgativo en formato papel e electrónico de extensión máxima de 3 follas, para a difusión que a Administración estime conveniente.
6. Entregar ás demais partes asinantes, no soporte requirido, os datos recollidos durante o desenvolvemento do dito proxecto.

Augas de Galicia comprométese a:

1. Prestar apoio nas actividades desenvolvidas por ADEGA.
2. Asesorar, na medida das súas posibilidades, para a elaboración dos protocolos de actuación e dos programas formativos do voluntariado.
3. Participar no financiamento das actividades mediante a entrega dunha subvención a ADEGA, de conformidade co sinalado na cláusula terceira deste convenio.
4. Colaborar xunto co Instituto do Estudos do Territorio e ADEGA na elaboración



dunha listaxe na que se determinen os tramos fluviais prioritarios perseguindo deste modo a máxima eficiencia no desenvolvemento das actividades programadas.

5. Manter un portal web con xeovisor asociado a unha base de datos, para a organización e publicación dos datos do Proxecto.

O Instituto de Estudos do Territorio comprométese a :

1. Colaborar xunto con Augas de Galicia e ADEGA na elaboración dun listado no que se determinen os tramos fluviais prioritarios perseguindo deste modo a máxima eficiencia no desenvolvemento das actividades programadas.
2. Propiciar un asesoramento para o mantemento técnico do xeoportalo de participación cidadá na información hidrográfica de Galicia.
3. Asesorar a Augas de Galicia no referente ao mantemento e soporte do xeoportalo web.
4. Coordinar as actuacións do programa no marco do Plan Proxecta Ríos.

TERCEIRA. RÉXIME DE FINANCIAMENTO

En relación co financiamento das actuacións realizadas por ADEGA, como promotora do PROXECTO RÍOS, dende o 1 de xaneiro de 2022, en virtude do obxecto deste convenio, Augas de Galicia aportará dentro do exercicio 2022, unha contía máxima de cincuenta mil euros (50.000,00 €) con cargo ao seu programa de actuacións, investimentos e financiamento para o exercicio 2022, e o gasto imputarase á conta 6518 "Subvencións correntes a familias e institucións sen fin de lucro" do Plan xeral de contabilidade pública de Galicia.

CUARTA. RÉXIME DE XUSTIFICACIÓN

Será de aplicación o disposto na Lei 9/2007, do 13 de xuño, de subvencións de Galicia (LSG) e no seu regulamento de desenvolvemento, aprobado polo Decreto 11/2009, do 8 de



xaneiro. En consecuencia, ADEGA, na súa condición de beneficiario, asume os compromisos establecidos no artigo 11 da citada Lei, e en concreto:

- a) Cumprir o obxectivo, executar o proxecto, realizar a actividade ou adoptar o comportamento que fundamenta a concesión da subvención.
- b) Xustificar ante Augas de Galicia, a realización da actividade e o cumprimento da finalidade que determinen a concesión ou o goce da subvención.
- c) Someterse ás actuacións de comprobación que efectuará Augas de Galicia, así como a calquera outra actuación de comprobación e control financeiro que poidan realizar os órganos de control competentes, para o que se achegará canta información lle sexa requirida no exercicio das actuacións anteriores.
- d) Comunicarlle a Augas de Galicia a obtención doutras subvencións, axudas, ingresos ou recursos que financien as actividades subvencionadas.
- e) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.

En canto ao réxime de xustificación dos gastos, ADEGA asume como beneficiario as seguintes obrigas:

- De acordo co previsto no artigo 28 da LSG, unha vez rematadas as actuacións, deberá ser xustificado ante Augas de Galicia o cumprimento das condicións da execución e a consecución dos obxectivos previstos. A tales efectos, e en todo caso antes do 1 de decembro do 2022, ADEGA achegará as correspondentes facturas, no seu caso nóminas, nas que se farán constar os gastos ocasionados e os distintos conceptos, acompañada da oportuna certificación sobre as actuacións realizadas. Non obstante Augas de Galicia poderá efectuar, a medida que se vaian realizando as actividades, un abono parcial da cantidade comprometida mediante a presentación das oportunas certificacións parciais, abonándose por cuantía equivalente á xustificación presentada. O importe conxunto dos pagos a conta non poderá ser superior ao 80% da cantidade subvencionada. De conformidade co disposto no artigo 67, en relación co 65.4, f), do Decreto 11/2009, de 8 de xaneiro, polo que se



aproba o Regulamento da Lei 9/2007, de 13 de xuño, de subvencións de Galicia, non será necesario que ADEGA presente garantía para a realización dos pagos a conta.

- Facilitar, se fose o caso, toda a documentación que requira a Intervención da Comunidade Autónoma, o Tribunal de Contas e o Consello de Contas de Galicia, no exercicio das súas funcións de fiscalización e control do destino das axudas obxecto do presente acordo.
- Comunicar a Augas de Galicia, se fose o caso, as alteracións nas condicións tidas en conta para a concesión da axuda obxecto do presente acordo e, en todo caso, a obtención concorrente de subvencións ou axudas outorgadas por outras administracións, entes públicos ou privados, nacionais ou internacionais aos efectos de propoñer, se procedera, a modificación das condicións establecidas neste convenio.
- Reintegrar a Augas de Galicia de acordo co artigo 33 da Lei 9/2007, a cantidade total ou parcial da axuda establecida, e dos xuros de demora devindicados dende o momento do seu pagamento neste convenio para o caso de incumprimento das condicións nel establecidas.

A concesión de axudas deste convenio queda supeditada ao cumprimento da normativa vixente. Neses termos, serán compatibles con calquera outras axudas públicas ou privadas pero, en ningún caso, poderán superar os límites máximos de intensidade de axuda establecidos na normativa da Unión Europea.

QUINTA. COMISIÓN DE SEGUIMIENTO

Constituirase a iniciativa de calquera das partes unha comisión de seguimento deste convenio, formada por un representante de cada unhas das partes, que asumirá as seguintes funcións:

- Impulsar e avaliar o cumprimento do convenio, propoñendo as actuacións que se consideren precisas.
- Interpretar, en caso de dúbida, o contido deste convenio.
- Propoñer ás partes a resolución das posibles controversias que puideran xurdir na



súa aplicación.

Actuará como presidente o representante de Augas de Galicia, con voto de calidade.

Esta comisión reunirse as veces que se estimen oportunas para o cumprimento do convenio.

Os membros desta comisión de seguimento poderán asistir ás reunións desta acompañados do persoal técnico que consideren oportuno. Ademais, cando se considere oportuno, a comisión de seguimento poderá requirir a asistencia técnica necesaria para a avaliación e análise das distintas cuestións sobre as que deban adoptarse acordos.

SEXTA. VIXENCIA DO CONVENIO

Este convenio entrará en vigor ao día seguinte da súa sinatura, sendo de aplicación aos gastos realizados dende o 1 de xaneiro de 2022, de conformidade co disposto na cláusula terceira deste convenio, e manterá a súa vixencia ata o 31 de decembro de 2022.

SÉTIMA. PERSOAL

A subscrición deste convenio non leva consigo modificación da relación laboral, contractual ou de calquera outro tipo entre os profesionais que vaian a desenvolver as actividades e Augas de Galicia e o Instituto de Estudos do Territorio, de tal xeito que non se lles pode esixir responsabilidade ningunha, nin directa nin subsidiaria, polos actos ou feitos acaecidos no desenvolvemento do mesmo, aos efectos do establecido no artigo 43 do Estatuto dos Traballadores.

OITAVA. MODIFICACIÓN DO CONVENIO

Calquera modificación no contido deste convenio, requirirá acordo unánime entre as partes e tramitarase a través dunha addenda ao convenio.



NOVENA. CAUSAS DE EXTINCIÓN

Será causa de extinción automática do convenio:

- o cumprimento do seu obxecto
- o transcurso do seu prazo de vixencia

Ese convenio tamén poderá extinguirse por incorrer nalgunha das seguintes causas de resolución:

- o mutuo acordo entre as partes asinantes
- a inviabilidade da realización das actividades descritas neste convenio, por causas non imputables ás partes
- o incumprimento grave do seu contido ou das obrigas das partes, sen prexuízo dos danos e responsabilidades imputables ao causante.

DÉCIMA. PROTECCIÓN DE DATOS DE CARÁCTER PERSOAL

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), da Lei Orgánica 3/2018, do 5 de decembro, de protección de datos persoais e garantía dos dereitos dixitais e demais normativa vixente de aplicación en cada momento en materia de protección de datos.

UNDÉCIMA. PUBLICIDADE

Con carácter xeral, en todos os documentos que se xeren como consecuencia deste convenio debe figurar de xeito expreso a participación tanto de Augas de Galicia como do Instituto de Estudos do Territorio mediante a inserción dos seus logotipos, así como o da Xunta de Galicia.



As partes asinantes consenten expresamente a inclusión e a publicidade dos seus datos persoais e demais especificacións recollidas neste convenio, no Portal de transparencia e Goberno aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, e no Decreto 126/2006, do 20 de xullo, polo que se regula o Rexistro de Convenios da Xunta de Galicia. Neste sentido, as partes prestan expresamente o seu consentimento para que se lle de a este convenio a publicidade esixida.

DUODÉCIMA. NATUREZA DO CONVENIO

Este convenio de colaboración ten natureza administrativa, rexendo na súa interpretación e desenvolvemento o ordenamento xurídico - administrativo.

A xurisdición competente para resolver as cuestión litixiosas que poidan xurdir é a contencioso – administrativa.

En todo o non disposto por este convenio, no que o réxime de financiamento se refire, estarase ao disposto na normativa de aplicación en materia de axudas e subvencións, máis concretamente na Lei 9/2007, do 13 de xullo, de subvencións de Galicia e no seu Regulamento de desenvolvemento.

En proba de conformidade cos termos deste convenio as partes asinan electronicamente.

A presidenta do Instituto de Estudos do Territorio, Ángeles Vázquez Mejuto

A presidenta de Augas de Galicia, Ethel María Vázquez Mourelle

O presidente de ADEGA, Roi Cuba Dorado



ANEXO I. ACTIVIDADES DO PROXECTO RÍOS A DESENVOLVER POR ADEGA

- **Coordinación, orientación e asesoramento dos grupos participantes no Proxecto Ríos:** captación; comunicación vía teléfono / e-mail; envío de forma gratuíta de material de inspección, material divulgativo e reactivos; rexistro e actualización da base de datos.
- **Elaboración e impresión de materiais divulgativos:** tríptico divulgativo do Proxecto Ríos; Calendario 2022; póster de macroinvertebrados; impresión fichas Exóticas Invasoras (editadas en PDF en 2021); edición e impresión de fichas de plantas acuáticas e anfibios; cartaces divulgativos das actividades.
- **Formación do voluntariado:** dous cursos para coordinadores de grupo, un por campaña; saídas formativas de acompañamento aos grupos participantes.
- **Encontro de voluntariado:** actividade que nos últimos anos ten formato de descuberta de biodiversidade na contorna fluvial, centrada nun río na que se convida aos grupos de voluntarios/as. Contamos co asesoramento de especialistas en fauna e flora. Durante unha xornada identifícanse a maior cantidade de organismos posible. Faixe un xantar comunitario e unha posta en común das especies identificadas.
- **Limpeza simultánea de ríos:** organización e coordinación dunha campaña de recollida de lixo nos ríos do noso país, en colaboración con entidades locais e outros colectivos. Elaboración, deseño e envío dos materiais divulgativos da actividade; reedición do protocolo de limpeza de ríos; mantemento da web específica da limpeza de ríos; elaboración da memoria recompilando os datos e fotografías da realización da actividade e atención aos medios de comunicación.
- **Roteiríos 2022:** organización e difusión de rutas guiadas por cursos fluviais destacables coa finalidade de divulgar os seus valores naturais.
- **Xornada teórico práctica de Custodia Fluvial:** organizará unha xornada destinada aos grupos participantes, asociacións, concellos, etc, sobre cuestións relacionadas coa elaboración e execución de proxectos de custodia do territorio no ámbito fluvial.
- **Publicación do boletín Gardarríos** de difusión mensual. Publicación de novas e crónicas das actividades nas páxinas web: www.proxectorios.org e www.adega.gal



- **Difusión de actividades do Proxecto Ríos**, así como de novas relacionadas cos ecosistemas fluviais en RRSS, nomeadamente Facebook e Instagram. Redacción de artigos sobre o Proxecto Ríos en diferentes medios dixitais e/ou impresos.
- **Xestión e actualización do Xeoportal do Proxecto Ríos**, creado para a divulgación á sociedade do estado de saúde dos ríos inspeccionados polo voluntariado.
- **Charlas informativas** e asistencia a congresos ou eventos que teñen como obxectivo dar a coñecer o proxecto en diferentes lugares e entidades (centros de ensino, concellos, asociacións, etc.) Este tipo de divulgación está aberta a todos aqueles que o soliciten.
- **Informe Anual do Proxecto Ríos**: elaboración e presentación dun informe que recolla os resultados das inspeccións do voluntariado durante o ano anterior.
- **Elaboración de 2 memorias de actividades**, nos meses de xullo e decembro que servirán de informes de execución, en formato electrónico. Neles reflectirase o número de grupos, persoas e concellos participantes e a valoración de resultados así como a xustificación económica. Informará trimestralmente á comisión de seguimento da evolución do programa.
- Porá en funcionamento una **aplicación móbil** para que o voluntariado poida recoller a información das inspeccións en diferentes dispositivos móbiles.
- Creación e edición de **vídeos divulgativos** que de guía para o desenvolvemento das súas inspeccións, así como as boas prácticas á hora da súa realización.

